

TE HEEHURAA ARI

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 3.

Mati 1927.

Mat. 21.

E na o, ma te 'oé, te taheraa i te toto, e oto ai te mau taata no te ao; e no te oé, e te pohe, e te mau ueue fenua ra, e te patiri o te ra'i, e te anapa uira atoa ra, e faafafa to te ao i te riri rahi e te mainaina e te rima a'o o te Atua mana hope ore ra, e tae noa'tu ia hope te mau nunaa i te hopea i faaitehia ra. (Buka Fafau 87:5)

Te Tupuraa

A TAI'O AI tatou i te mau vea no te mau fenua atea mai, eaha te rahiraa o te parau i neneihia i roto? Teie te pahonuraa, maori râ, te mau ati te tupu nei i teie mau mahana. A feruri maite tatou i teie mau parau, no te mea e, te vai nei te haapiiraa e te mau tapao i roto i taua parau nei. A ui ia tatou. tatou iho, i te hoé niraa e, eaha te huru o teie mau ati te tupu nei? Aita'tu e pahonuraa, maori râ, te huru no te mau ati mai ta te mau peropheta i tohu mai.

I roto i te parau papai, ua na ô maira Iesu e, "E e faaroo outou i te parau tamaí, e te ueue roo tamaí, e ara râ eiaha outou e mataú; ia tupu hoi taua mau mea ra e tia'i; aita râ e fatata te hopea i reira. E tia mai hoi te tahi fenua e aro mai i te tahi fenua e te tahi basileia e aro mai i te tahi basileia; e o'e hoi e te maí, e e ueue fenua i tera vahi i tera vahi. E matamehai anaé râ teie nei mau mea no te pohe. (Mataio 24:6-8)

Te tupu nei teie mau parau i roto i te mau fenua i te ao nei. Te tamaí nei te tahi pae no te Tinito i te tahi pae,

ua pohe atoa ratou i te maí e te o'e ino roa; ua na reira'toa ia i te fenua Marite Apatoa, e te faaroo noa nei tatou i te ueue roo tamaí no taua fenua ra; mai te reira atoa te tahi mau basileia i Europe, ua hinaaro te hoé taata i te mana arii no to'na ra fenua e i roto i to'na raveraa i te reira e tupu ia te tamaí. I te fenua Marite i te tufaa fenua ra i Califoronia i teie mau avae, ua tae pinepine noa mai te ueueraa fenua e ua haamouhia te tahi mau oire ra. I te tahi mau tufaa fenua, ua topa hua mai te ua, e te ua paari, e te hiona e no te reira peapea na atihia to taua fenua ra.

E mau tapao teie no te pohe i parauhia i nia nei, e mai te mea e, e hinaaro tatou ia farere i te Mesia ma te oaoa, ia imi ia tatou i te Basileia o te Atua e tia'i. Aita roa e neneh i te taata ia faaroaroa i te mahana a tatarahapa'i oia, no te mea e, aita tatou i ite i te hora oia e tae mai ai.

—*Papaihia e Elita.*



Te Huru no te Haamouraa o te Ohipa Tama'i

Te Faaroo no te Feia Mo'a Mau.

Ua iritihia teie nei parau na roto mai i te buka, Te Faaroo no te Feia Mo'a Mau tei papaihia e Tamate; Faaauhia ei reo Tahiti e Ioane Orotona,

*Te faaroo nei matou e, no te taraehara o te Mesia ra e ora'i te taata atoa o tei haapao i te mau ture e te mau faaue-
raa a te Evanelia nei.*

(E tuatiraa teie nei parau.)

Uiraa 8. Eaha te tumu e ore e tia'i ia tatou ia bapetizo i te mau tamarii rii e te aiu?

P. Tera ia te tumu, no te mea, na roto i te bapetizoraa i te aiu, na faaore tatou i te maitai e te aroha i horoahia mai e Iesu Mesia na roto i te taraehara.

Parau tauturu. E haapiiraa tumu teie no te Ekalesia a Iesu Mesia i te Feia Mo'a i te Mau Mahana Hopea Nei e torn tumu e vai nei no taua haapiiraa ra. Tera ia te mata-mua, oia hoi, te feruriraa tia, te piti, te aroha o te Atua, te toru râ, te mau parau papai ia, o tei na ô mai e, e mea hara ore te tamarii i mua i te aro o te Atua, e no reira, e ere ia i te mea tia ia bapetizo ia ratou. Na roto i te faa-fanauraa i te tamarii, ua roaa te tahi mau hara e te tahi mau mea au ore i te tamarii o te taata nei. Aita e tia ia bapetizohia te tamarii no te mea, aita e tia ia ratou ia tatarahapa. No te mea, na mua te tatarahapa, e ia oti, farii iho â te bapetizoraa. "Aita e tia i te tamarii rii ia tatarahapa; no reira e parau ino rahi roa ia huna i te aroha mau o te Atua ia ratou, ua ora hoi ratou faatoa ia'na no to'na aroha. E o te parau mai e, ia bapetizohia te tamarii rii e tia'i, o te huna ia i te aroha o te Mesia, e te faaore hoi i te taraehara na'na, e te mana o ta'na ra ohipa faaora. Atae hoi te taata mai te reira te huru, ua fatata hoi ratou i te pobe, te hade, e te manini mure ore. Te parau nei au ma te matau ore, na te Atua hoi i faaue mai ia'u. E faaroo mai i te reira e e haapao, e ia ore râ, e faahapahia ontou i te reira ia tae i te haavaraa o te Mesia ra. Inaha hoi, na

ora te mau tamarii rii atoa i te Mesia, e ratou atoa tei ore i ite i te ture ra. E tae hoi te mana e ora'i i nia ia ratou aore o ratou e ture ra; no reira, o te ore e faahapabia ra, eita e tia ia'ni te tatarahapa; e eita e faufaahia te taata mai te reira te huru i te bapetizo." (Moroni 8:19-22)

Ua papai mai te peropheta ra o Moromona i ta'na ra tamaiti ia Moroni, mai te faaite papu mai i to'na mau manaó i nia iho i te huru o te bapetizoraa tamarii. "A faaroo mai i te mau parau a te Mesia, o to'oe Faaora, to'oe Fatu e to'oe Atua hoi. Inaha, aore au i haere mai i nia i te fenua nei e parau i te feia parau-tia, i te feia parau-ino râ ia tatarahapa: e ere no te feia ora te taote, no te feia mai râ; e te tamarii rii ra ua ora ia ratou, aita hoi e tia ia ratou i te rave i te hara; e te hara a Adamu ra, ua faaorehia ia e au, e aita to te reira e mana i nia ia ratou; e te ture no te peritome ua faaore-atoa-hia ia ia'u. Inaha, te parau atu nei au ia oe, o teie ia ta outou e haapii; e haapii outou i te tatarahapa e te bapetizo i tei tia ia ratou i te rave i te hara; oia ia, e haapii outou i te mau metua ia tatarahapa, e ia bapetizohia, e ia faahaehaa ia ratou iho mai ta ratou mau tamarii rii e tia'i, ei reira e ora atoa ratou e ta ratou mau tamarii rii atoa ra. Aita hoi e au te tatarahapa i ta ratou tamarii rii ra, aita atoa te bapetizo. Inaha, ua haapaohia te bapetizo no te tatarahapa e au i te faatiaraa i te mau faaue no te faaoreraraa i te hara. Ua ora râ te tamarii rii i te Mesia mai te haamanraa mai â o teie nei ao; Ahiri aita ia, ua riro te Atua ei Atua faatia pae tahi, e te faahuru ê, e te haapao i te huru o te taata; te rahi hoi o te tamarii rii ra i pohe na aore i bapetizoraa." (Moroni 8:8, 10, 11, 12)

E i teie mau mahana hopea nei, ua tae mai te parau, "E inaha, e parau atu vau ia outou, e ua faaorahia te tamarii rii mai te faatumu-raa-hia mai â o te ao nei, na roto i taú Fanau Tahiti; no reira e ore a ratou e hara, aita te mana e tun atu ia Satani ia faahema i te tamarii rii e tae noa'tu i to ratou riroaaa ei feia manaó i mua ia'u nei." (B. F. S. 28:13)

Te Huru no te Tia-faahou-raa Mau

U A NA Ô MAIRA te parau papai e, "E here â hoi te Metua i te Tamaiti, e faaite mai â hoi ia'na i te mau mea atoa ta'na iho e rave ra; e mea rahi atu â ta'na e faaite mai ia'na i teie, ia umere outou. Mai te Metua hoi e faaora i teie pohe ra e ua faatia ia ratou i nia, e faaora atoa hoi te Tamaiti i ta'na i hinaaro. Aore roa hoi â te Metua taata i haava, ua pûpû-hua-hia mai te haava i te Tamaiti: ia haamaitai paatoa i te Tamaiti mai ta ratou e haamaitai i te Metua ra. E te ore e haamaitai i te Tamaiti ra, aore ia i haamaitai i te Metua i tei tono mai ia'na ra. Amene, amene, e parau atu vau ia outou, O tei ite i ta'u parau e ua faaroo ia'na i tei tono mai ia'u nei, e ora mure ora to'na, e ore ia e faahapahia, mai te pohe mai ia, e tei te ora'tura." (Ioane 5:20-25)

Ua tia faahou mai Iesu, mai te pohe mai. Aita e patoi-raa tia no taua parau ra. Area râ, te patoi-noa-hia nei teie parau e to te ao, e te parau mai nei te tahi mau orometua e, "e ere Iesu te Mesia, te Tamaiti Fanautahi a te Atua ra." Ua papaibia teie irava i nia nei ei faaite papu e, aita roa e nehenehe i te hoé taata ia haamori i te Atua, maori râ, ia haamori atoa oia i te Tamaiti e tia'i. E mai te mea, aita te taata e faaroo e, o Iesu ia te Faaora o teie nei ao, aita'toa ratou e faaroo i te Atua tei tono mai ia'na ra. Te faatura nei tatou i te Atua na roto i te Tamaiti, e o tei ore e faaroo papu i te Tamaiti e te mana o te tia-faahou-raa, e ore hoi tera taata e ite i te Atua ra. Ua na ô faahou mai-ra Iesu e, "O tei faaroo i te Tamaiti ra, e ora mure ore to'na; e o tei ore i faaroo i te Tamaiti ra, e ore oia e ite i te ora, te vai ra ia te riri o te Atua i nia iho ia'na."

Eiaha râ tatou e manaó e, e ore tera mau taata tei patoi i te Tamaiti e tia faahou, no te mea, e tia faahou mai te taata'toa, mai te pohe mai. Area râ, eita roa te taata faaroo

ore e farii i te ora mure ore i roto i te Basileia o te Atua, oia hoi, i te vahi e parahi ai te Metua e te Tamaiti. Na roto râ i te opuaraa tiá o te Metua, ua haere noa'i te mana o te tia-faahou-raa i te mau taata'toa na roto i te taraehara o te Mesia. No reira, e mea papu ia e, aita e nehenehe ia tae i te Basileia o te Atua, maori râ, na roto i to tatou farii-raa i te Tamaiti a te Atua ei faaora no tatou. No reira o ratou tei patoi noa mai i te mana e te hanahana o te Tamaiti, e vai â te riri o te Atua i nia iho ia ratou.

I teie nei râ, ua tupu te hoé uiraa, oia hoi, eaha te faufaa no te tia-faahou-raa? Ua ite tatou, oia hoi, te mau taata no te Ekalesia, i te faufaa no te tia-faahou-raa, no te mea, ua heheuhia mai ia i roto i te mau mahana hopea nei, e mea papu hoi te mau parau papai no nia iho i te reira vahi. Ua ite tatou e, ua fâ mai te Mesia i ta'na mau pipi i muri aé i to'na tia-faahou-raa, e ua faaitehia oia iho ia ratou. E teie nei, no te aha te tia-faahou-raa? e no te aha hoi i horoahia'i te parau fafau, o tei na ô mai e, "e tia faahou mai te taata'toa mai te pohe mai"? Te faaroo nei te tahi pae e, e oti ta te tino ohipa i roto i teie nei ao, e aita roa te tino e tia faahou ia tae te tia-faahou-raa, te varua râ, e haere ia oia i piaho i te Atua. Eaha te tumu Iesu i haere mai ai i roto i teie nei ao e pohe no tatou? No te mea anei, ua ore te mau opuaraa o te Atua na roto i te hararaa a Adamu? E tino to Adamu hou i to'na poheraa, e ua riro hoi to'na hiáaraa ei tufaa no te faaoraraa o te taata nei. Ua roaa ia tatou te tino tahuti e te poheraa na roto i te hara a Adamu, e na roto ia Iesu, e roaa'i ia tatou te tia-faahou-raa, te tino tahuti ore, e te ora mure ore. Na te Buka a Moromona e haapii ia tatou e, ua tae mai te taata i roto i teie nei ao, ia roaa ia ratou te ite e te paari, te ore e tae ia ratou, maori râ, na roto i to ratou oraraa nei. E na roto hoi i te haapaoraa i te mau ture o te Evanelia (e te tarae-

hara ïa te tumu no taua Evanelia ra) e roaa'i te ora e te hanahana i mua i te aro o te Metua e te Tamaiti.

Ua ite te Metua i te hopeá i te matamua e i roto i te apooraa i te raí hou te hamani-raa-hia o teie nei ao, i maitihia'i Iesu e haere mai i roto i teie nei ao e pohe, ia faatia-faahou-hia te ture i ofatihia ra, e ia horoa-noa-hia mai te ora i te taata nei. Ua haapii mai Petero i teie parau ia tatou, a na ô mai ai oia e, "ua ite hoi outou e aore outou i hoohia i te mea e ino noa ra, mai te ario e te auro, i ta outou parau faufaa ore i tuuhia mai e to outou hui metua ra; i te toto taoá râ o te Mesia ra, mai to te arenio ino ore e te maí ore; o tei haapao-atea-hia ïa hou te tumu o teie nei ao, i teie nei râ anotau hopeá i faaitehia mai ai no outou." (I Petero 1:18-20)

Ua parau maira Petero e, ua maitihia e ua faatoroahia Iesu hou teie nei ao, e haere mai ai i roto i teie nei ao, e faatia i te tia-faahou-raa e te faaoraraa hoi o te taata nei, na roto i te manii-raa-hia o to'na ra toto; e ua au hoi teie i te opuaraa i te matamua. Ua parau atoa mai te Atua ia Ioane, na ô maira, "E au te Arenio taparahihia ra e, ei ia'na te mana e te taoá rahi, e te paari e te puai, e te tura, e te hanahana, e te haamaitai."

Ua na ô faahou maira te parau i papaihia i te Apokalupo 13:7,8 E i tuuhia'tu ia'na te tamaí i te feia moá, e ia pau ratou ia'na, e e mana tei horoahia mai no'na i te mau opu atoa, e i te mau reo atoa, e i te mau fenua'toa. E o to te ao atoa nei tei haamori ia'na, o te ore i papaihia to ratou i'oa mai te matamua mai â o teie nei ao i roto i te buka a te Arenio i taparahihia ra.

Na roto i teie nei mau parau e ite papu ai tatou e, ua maitihia Iesu hou te fanauraa o te taata i roto i teie nei ao, ia manihia to'na ra toto ei tarachara no te pohe e te hara i roto i teie nei ao, e na roto i te reira, ua horoahia mai te

ora mure ore, na roto i te tia-faahou-raa. Ua ite-papu-hia teie opuaraa hanahana e te mau peropheta tahito. Ua haapii atura Iesu i te na ô raa'tu e, "Aue ia pue taata manaó ore e, e te faaróo taiáta i'tei hope i te parauhia mai e te mau peropheta ra e! E ere anei ia na reirahia to te Mesia pohe e tia'i a reva atu ai i to'na ra ao? Ua faaite maira oia ia raua i te auraa i te mau parau na'na iho i roto i te mau parau atoa i papaihia ra, mai ia Mose mai â e tae roa aéra i te mau peropheta'toa."

Ia oti aéra teie paraparauraa, ua farerei oia i na Apo-setolo e hoé ahuru ma hoé; ua parau faahou maira oia ia ratou i teie mau tohuraa, tono atura oia i ta'na mau pipi ei faaiteraa ia'na i to te ao.

Ia patoi tatou i te tia-faahou-raa o te Mesia, e te tia-faahou-raa hoi o te taata atoa nei, mai te pohe mai, e riro ia ei faaiteraa papu i to tatou nei ite ore i te ohipa i ravehia e Iesu Mesia. Ua opuhia i te matamua, ia haere mai tatou i roto i teie nei ao, e farerei noa i te mau ati e te peapea, e ia hara tatou. Ua maite-ê-hia na Adamu no ta'na ohipa, ia roaa i te taata te ite i roto i teie oraraa nei. No reira, e mea papu ia e, ua roaa to tatou huru tahuti na roto i te hinaaro o te Atua ra, e na roto i te hiaraa o Adamu i roto i te hara ra i tae mai ai te pohe i nia iho ia tatou nei. Na roto ra i te taraehara, ua horoa-faahou-hia te ora, i te haavi-raa-hia i te pohe. E ia haavihia te pohe (o to tatou ia enemi hopea) na roto i te tia-faahou-raa o te taata'toa nei, e faahoí ia te Tamaiti i te Basileia i to'na ra Metua.

Ua horoahia mai te tino ei parabiraa no te varua, e ia oti teie oraraa tahuti nei, e ia pohe tatou, te vai ra te mahana e tia-faahou mai ai te tino, e e amui-faahou-hia te varua i roto ia'na, ia ore e faataa-faahou-hia e a muri noa'tu. E i roto i te reira huru, e farere ai te feia parau

tia i te oaoa. Area te feia tia ore ra, e farerei ia ratou i te utua mai tei au i te ohipa ta ratou i rave i roto i teie nei ao. Ua hinaaro te Atua i te haamaitai i te taata atoa nei, te vai ra râ te ture i nia iho ia'na, e te vai ra hoi te ture i nia iho i ta'na ra tamarii, no reira aita e nehenehe i te Atua ia haapao i te huru o te taata, (Ohipa 10:34) maori râ, ia haava noa ia ratou paatoa mai te au i te ohipa i ravehia e ratou ra.

Ua tae mai tatou i roto i teie nei ao ia roaa te tino ia tatou ei vairaa no te varua. Ua faahapahia Satani, ia ore ia roaa ia'na te tino, e ia ore hoi ia haamaitaihia mai ia tatou te huru, i te mea e, ua tama'i atu oia i te Atua. E riro to tatou tia-faahou-raa mai te tia-faahou-raa o Iesu Mesia, ia maitai tatou i mua i te Atua ra.

Te ora nei tatou i roto i te tino nei, e te faaoromai nei tatou i te mau ati e te peapea huru rau o teie oraraa nei. Te farii atoa nei tatou i te oaoa. Te faaite nei tatou (na roto i to tatou tiama) i te vahi e au ai ia tatou ia parahi. E mai te mea e vai â te faaroo rahi i roto ia tatou, e mai te mea hoi e, e haapao tatou i te mau ture tei faatere i te Basileia o te Atua, mai te farii ia Iesu Mesia ei faaora no te ao nei, e roaa ia te hoe parahiraa hanahana ia tatou.

Papaikia e --Ioane Orotou

Aore roa hoi te hoé o tatou e ora nei ei faatupu i ta'na iho, e aore roa e taata e pohe nei ei faatupu i ta'na iho. Te ora nei tatou, i ora ia tatou ei faatupu i ta te Fatu; e te pohe nei tatou, i pohe ia tatou ei faatupu i ta te Fatu: e teie nei, te ora nei tatou, e te pohe nei hoi, no te Fatu â tatou. No reira hoi te Mesia i pohe ai, e i tia faahou ai i nia, e e tia hoi oia i te oraraa, ia riro oia ei Fatu no tei pohe e no tei ora hoi. (Roma 14:7-9)

Te Mau Parau Apî

I te oire Knoxville i te fenua i Marite, te ora nei te hoé vahine o Johnston te i'oa. Ua fanau oia e pae tamarîi i te matahiti hoé; i te pae matamua no te matahiti 1926 ua fanau oia i te maehaa e i te avae Tenuare i 1927 ua fanau oia i te putoru. Ua topahia te na i'oa o Aberahama, e o Isaata, e o Iakobo i nia iho i taua na aiû apî e tootoru ra.

Ua riro te rê no te utuafare rahi roa i te hoé taata e ta'na vahine i te tufaa fenua North Carolina i Amerika. Ua fanau raua e 19 tamarîi e te ora nei 18 no ratou. E piti ahura ma ono matahiti anaé to raua faaipoiporaa, e aita roa i fanauhia te maehaa. Ua tae te metua tane i te pae ahuru ma piti no to'na ra matahiti, e e maha ahuru e matou to ta'na vahine.

Te parahi ra i Marite te hoé ati Inidea i parauhia Seminole. Mai te matamua mai â i teie nei mau mahana e mau taata ino roa e te etaeta hoi ratou; aita roa ratou i auraro maitai i te hau Marite. I te avae ra Novema i te matahiti 1926, ua tae roa te hoé taata rahi no ratou i mua i te aro no te Peresitini no te hau Marite, ma te ani atu ia'na ia faariro ratou ei mau taata Marite e ia auraro hoi ratou i te mau ture fenua atoa ra. Toni Tami ia te i'oa no ta ratou arii rahi e ua horoahia te mana i roto i to'na rima ia faaoti i te mau vahi atoa; e no reira ua roaa'i ia ratou te huru apî, e ua ite ratou i te maitai i roto i te faatereraraa no te hau e ua afaro atoa te mau ture i nia i te mau taata Inidea. Ua tamaî ratou e te hau Marite i te matamua i roto i te Tamaî Seminole (Seminole War), e hitu matahiti te maoro no taua tamaî ra, e ua pohe roa e 1,500 taata Marite e e piti ahuru milioni (20,000,000) dara i maúa'i i taua peapea ra.

Te haponono nei te hau Marite, e 31,000 ofaí menema i te fenua Farani. E tuuhia'i taua mau ofaí ra i nia i te mau menema no te mau faehau Marite i taparahihia i roto i te tamaí rahi i maire aénei.

Ua taparahihia te hoé puaa taehae i te oire i Lynxville, i Marite. E maha hanere pae ahuru kilo to'na faitoraa, hoé ahuru avae to'na roa, e hoé ahuru initi te roa no to'na niho. E mea paari roa te iri no taua puaa ra, e hoé ahuru to'na huruhuru i te niuniu, e mea etaeta atoa e aita e nehe-nehe ia iriti te reira.

Ua iteahia te hoé ohipa apí roa i te oire Denver i te fenua Marite. E mea pinepine noa te taata i te eiâ i te moni e te mau huru taoá'toa ra. Area râ, teie taata nei, ua eiâ oia i te mau niho haavare no te hoé taata; ua au taua mau niho ra ia'na e ua tuuhia teie mau niho i roto i to'na ra vaha. Aita râ i maoro itehia ihora ratou e te mutoi, e ua faahoíhia'tura i te fatu mau.

I te 25 no Ditema, ua pohe roa te arii (emperor), o Yoehihito, no te fenua Iapone. Ua faatoroahia oia ei arii no taua fenua ra i te matahiti 1912. Ua tupuhia oia e te hoé maí ino roa, oia hoi, te tutoo, i te matahiti 1915, e mai te reira matahiti e tae roa mai i to'na poheraa ua vai noa taua maí i nia iho ia'na ra. I teie nei ra ua riro ta'na tamaiti matahiapo ei arii rahi no taua fenua ra. O Herohito ia to'na i'oa, e e taata apí roa hoi oia, e piti ahuru ma pae noa iho to'na ra matahiti. Ua tae râ oia i te mau haapiiraa maitai roa, e no te paruparuraa no to'na metua, ua hurihia'i te tahi pae no te ohipa a te hau i nia iho ia'na, e no reira oia i mâtau ai i taua ohipa ra. E taata feruri maitai oia e te hinaaro nei oia ia hau te mau mea i roto i to'na basileia, e e aroha'tu hoi oia i te mau taata no taua fenua ra.

Ua maite-faahou-hia te taata ra, o Kensaw Mountain Landis, ei taata faatere no te hautira taíri popo, (baseball) i te fenua i Marite. Ua horoahia ia'na e 65,000 dara, moni Marite, i te matahiti hoé no to'na faatereraa no taua ohipa hauti ra.

Ua iteahia te hoé taata ma te opu rahi i te fenua i Marite. Ua amu noa oia i te maa e rave rahi, e ua pau ia'na i te hoé noa iho tamaaraa, e 152 tio, e 3 aua taofe, hoé litera e te afa uaina, hoé afata faraoa papaa, e e piti tapuraa faraoa monamona.

I te fenua i Marite i te matahiti 1926, ua hamanihia e maha milioni maha hanere vaú ahuru tauatani (4,480,000) pereoo uira. E ua hoohia taua mau pereoo ra no te moni rahi, oia hoi, e toru bilioni pae ahuru ma ono milioni iva hanere pae ahuru tauatini (3,056,950,000) dara, moni Marite.

I te mau avae i mairi aénei ua faatiahia te hoe socaiete apî i te fenua Mariti. Te faatere nei taua socaiete ra i te ohipa paraparau i te radiophone i ropu i na fenua ia Marite e ia Baretane. E ravea apî roa teie ia haapoto te taima i pau no te ohipa i ropu i taua na fenua ra. E 3,500 maile te atea no taua na fenua ra, e ua tarahuhia te taata e 25 dara, moni Marite, ia paraparau oia e hoé noa iho minute na nia i te radiophone, e aita atoa e nehenehe ia'na ia paraparau i raro i te toro o te minute, e mai te mea e na reira oia, ia horoa'tu i te socaiete e 75 dara e tia'i. E ere atoa teie te moni rahi roa, no te mea, ua pau roa e pae milioni (5,000,000) dara, moni Marite, no te hamaniraa i taua radiophone apî ra.

Alma G. Burton Imprimeur,

Rue Brea et de la rue Dumont d'Urville, Orovini, Papeete